

«Ds Wort gilt» – ils Glarunais vulan trais vischnancas

In cumin extraordinari en il chantun vischin

DA CLAUDIA CADRUVI / ANR

■ **Dapi ier na datti nagins dubis pli. Ils Glarunais vulan be trais vischnancas en lur chantun. Il pievel da cumin ha decidì cler, net e bain-ponderà.** Pli che 10 000 Glarunais e Glarunais èn vegnids ier al cumin extraordinari en la pli pitschna chapitala svizra. Per l'emprima giada han era giuvenils da 16 e 17 onns dastgà votar. Il cumin ha cumenzà a las 09.30. Intgins votants avevan prendì cuvertas per zugliar enturn las chommas u in plimatsch per metter sut il tapun sin il baun fraid. Ma la gronda part dal pievel ha stuì star en pe e tadlar en tutta fradaglia ils votums pro e contra la refurma da vischnancas.

Fatschas rientas e levgiament

Ils votants glarunais han demusà pazienza e madrezza democratica. Duas uras han els tadlà cun calma radund ventg oratur. Pir suenter duas uras hai dà in ramurar en la raspada, perquai ch'in oratur na chattava betg la finiziun da ses pled.

Lura è vegnì votà. Tar la dumonda, sch'ins veglia davent dal 2011 be pli trais vischnancas a Glaruna, eran ils cedels sur ils chaus da la raspada bler pli spess che tar la dumonda, sch'ins veglia mantegnair las 25 vischnancas. Suenter la votaziun han ins vesi bliers fatschas rientas en il pievel. En las ritschas dals politichers e da la regenza han ins pudì fastizar levgiament.

Decisiun nunponderada

Dasperas è la regenza l'emprim stada encunter il «model da trais». Al cumin dals 7 da matg 2006 ha

la regenza proponì da structurar il chantun en diesch vischnancas. Ma il pievel ha votà per il «model da trais» ch'in singul burgais aveva proponì.

Ils adversaris da quest model radical èn ids fin avant la dretgira federala. Lezza ha dentant ditg che la decisiun saja valaivla. Sinaquai han ils adversaris rimnà sutscritziuns per in cumin extraordinari che reponderescha il model da trais vischnancas. Ina da las reproschas principalas dals adversaris: La decisiun per il «model da trais» è vegnida prendida a moda nunponderada.

Per pudair sa preperar sin il cumin extraordinari dad ier ha mintga votant obtegni in memorandum da trenta paginas ch'explitgescha la tractanda. En il fratemp è la regenza glarunaisa sa messa davos il «model da trais», pertge a Glaruna vala la tradiziun «Ds Wort gilt». Quai munta pli u main: Tge ch'il cumin decida, vala e vegn realisà.

Ils giuvenis èn per structurass veglias

Ils emprims oratur ch'èn ids ier sin la tribuna a Glaruna èn stads giuvenis e giuvnas sut 25 onns. Ils bliers han argumentà cunter il «model da trais» e per mantegnair las structurass veglias. «Èsi en urden, sche Vus stuais maridar in partenari, dal qual Vus avais adina ditg, quel na vi jau mai?» ha in giuven dumandà. In auter ha manegia ch'ìls giuvenis glarunais veglian conceder a moda activa. Quai saja pli simpel en vischnancas pitschnas, che en structurass grondas.

Ina giuvna ha ditg: Elm n'ha ja quest onn anc gì gnanca ina solia naschienscha, ed en l'ultim

figl uffizial chantunal figureschian sulet sis naschienschas sper indesch moritoris. Pervi da questa sminuziun da la popolaraziun ha ella argumentà per il «model da trais».

Ritgs versus paupers

Suenter ils giuvenis han pledà plirs presidents da vischnanca. *Hanspeter Zweifel*, president da Linthal che profitescha dals tschains d'aua, ha enumerà ina entira ritscha da professurs e d'experts che dian ch'il «model da trais» na saja betg pratigabel u illegal.

Tut auter hai tunà tar *This Vögeli*, president da Rüti. «Schizunt il chantun ha considerà nus sco mustga mulestusa», ha Vögeli descrit il temp che sia vischnanca è stada en misergias finanzialas. Las vischnancas pli ritgas na fissan mai prontas da fusiunar voluntariamain cun vischnancas paupras. Perquai ha Vögeli propagà il «model da trais».

Jakob Kamm, il director d'educaziun, ha fatg attent che las vischnancas pitschnas na dumognan strusch las midadas ch'i dat ils proxims onns en il sector da scola. Cun il «model da trais» sa laschian las refurmas da scola realisar bler pli bain ed a moda pli democratica.

Stut dal resultat

Ella saja levgiada e surstada, ha *Marianne Dürst*, cussegliera guvernativa, ditg suenter il cumin. Ella haja spetgà in resultat stgars. «La decisiun dad oz rinforzescha il cumin», ha Dürst ditg. «Bliers Glarunais han avunda dals tugnims.» Il cumin dal 2006 aveva effectuà in moviment ed in resvegl tar il pievel. Quest resvegl possia uss cuntinuar.



Duas uras – en tutta fraidaglia – han ils burgais glarunais tedlà ils votums pro e contra la refurma da vischnancas. KEYSTONE